

欽定剿平三省邪匪方略

欽定剿平三省邪匪方略正編卷九十三

己未年

三月十三日

辛未

上命軍機大臣傳諭勒保及湖廣陝甘河南各督撫
曰此次剿捕教匪調集綠營官弁屯練兵丁以及
鄉勇人等爲數不少其節次打仗陣亡者多有未
經奏明一體仰邀卹賞又教匪蹂躪之處有紳士
良民禦賊身殞並至闔門被害者亦多未邀旌卹

此等捐軀殉節之人或効命行間或遇賊不屈殊
堪矜憫若不加之追獎何以伸勵士氣彰表良善
著勅保及湖廣陝甘河南各督撫將從前各路軍
營効命死事之文武官員兵勇及被賊戕害之士
民一體查明據實具奏候朕降旨加恩以慰忠魂
而昭激勸

上諭內閣曰川省剿捕教匪從前有在軍營病故之

總兵德光富爾養穆維三員雖非打仗陣亡但帶
兵日久因積勞病故亦屬可憫著交部照例給予
卹典

臣等謹案致命遂志實臣子分所當然顧春
秋之義死王事則例有加等誠以崇獎忠貞
勵臣節而作士氣也自邪匪滋事以來凡官
弁兵勇歿於行陣者一經報聞靡不渥荷

恩施優予議卹茲復蒙

皇上軫念蓋良以此等打仗陣亡者尙一體邀

恩而紳士齊民之禦賊殞命或闔門遇害者並

諭大吏查明奏請旌卹其軍營病故之總兵亦蒙

賞給卹典仰見

天心仁愛普被無遺身行在行間者感激奮興羣思

効命也

同日

上諭內閣曰昨已降旨令景安來京候旨景安在督撫任內畏葸無能本應治罪但念伊平日操守尚屬謹飭現在川省軍需轉輸事宜甚關緊要著景安於倭什布到楚接印後以伯爵前赴川省更換明興接辦軍需事務此係朕格外施恩予以自新之路景安務須倍加感奮痛改積習會同福寧認

真妥協經理以期源源接濟毋悞要需明興著卽
回赴軍營聽候經畧勒保派令帶兵打仗

上又命軍機大臣傳諭勒保曰朕問明興在軍營於
糧餉出納之事不能清楚而福寧操守亦屬平常
現已降旨將明興撤回令勒保酌派隨同帶兵其
所辦糧餉事務因景安平日尙有操守寸長可取
是以令其前赴川省接辦以觀厥後效景安如不悞

任卽行奏聞更換不可因朕特派又存迴護現在
剿捕賊匪正當喫緊之時一切支發轉運等事於
樽節之中尤須經理得宜供輸無悞勒保仍當隨
時查察倘有仍前扣剋侵冒及辦理不善貽悞要
需之處卽行據實叅奏不得稍有徇隱

十五日

癸酉

福寧奏言

臣

自二年正月間由湖北

帶兵入川沿途訪察卽聞川省軍興以來各路

供支未能遵照定例覈實辦理其官兵夫騾價
值鄉勇鹽糧等項宜綿總統軍務因追剿竄匪
逐日移營一時權宜核發所費尤爲不貲俱未
奏明有案是以臣二月間接辦糧餉卽將從前
動支各欸劃清界限毋使混淆其浮支各項均
經痛加釐剔次第革除惟兵丁日夕追奔逐北
不得不稍爲變通隨將夫騾各欸會同勒保英

善分晰具奏嗣經部駁行據藩司林僑按款覆核雖係例所本無實爲勢所必需現仍量爲支給擬再會同勒保臚款奏懇

天恩勅部核覆俾得列入正銷以歸實用又鄉勇一項前據司道冊報各營暨各州縣所募隨營打仗以及防守城池卡隘保護糧臺爲數較多當經_臣據實奏明並嚴禁嗣後毋得私行招募其

現有鄉勇亦須酌量賊氛之遠近營卡之緊要
隨時造冊呈送勒保核明知會始准支給銀糧
從未敢任聽冒濫至各路運道時通時塞所有
軍火糧餉等項往往運至中途被阻卽須改道
轉輸甚或繞至他途復行遇賊則又須折回轉
運以致夫騾載道動輒經旬口糧工價數逾倍
甚且間有猝不及防被賊搶掠傷斃夫役之事

此輓運之所以多費也又各軍營需用帳房烏鎗以及弓刀器械等項一遇破爛損折無論例限應否更換均卽照數辦解補給其官兵乘騎馬匹登山陟險縱橫馳驟倒斃時聞不得不隨時撥解所有各營缺額馬匹更須加價補買以備續調此軍裝馬匹之不能悉照成例也至

臣

上年兩次請過銀七百萬兩均分撥成都保寧

達州三局收貯每遇各營及各臺站請領

臣確

加綜覈卽批飭各局就近按數兌發總理糧員
支用並嚴飭各該員認真撙節悉心經理如有
違例濫費一經查出定行據實叅奏決不敢稍
事瞻徇再查徐添德一股賊匪現由太平折竄
開縣雲陽地方經德楞泰帶領官兵緊追躡剿
又冷添祿包正洪等逆入竄營山渠縣廣安一

帶額勒登保督師剿辦勒保現在遼州白塔壩
山梁居中駐劄調度所有各營需用軍火糧餉
等項俱經臣分飭四路趕運源源接濟奏入

上命軍機大臣傳諭勒保福寧曰此次軍需經費數
逾七千餘萬皆由各路領兵大員任意濫用所致
朕聞之至熟今福寧摺內稱宜綿總統軍務時因
追剿賊匪逐日移營一時權宜核發所費不貲卽

此二語已包括無數浮支濫用矣至所稱各路運道時通時塞軍火糧餉等項間有被阻被搶之事尚屬實情嗣後總宜似此據實具奏不可稍有粉飾又據奏徐添德一股現由太平折竄開縣雲陽地方經德楞泰帶兵追剿等語前據勒保奏訥音保派在開縣帶兵防堵但從未聞伊曾經打仗殺賊不過在無賊處所退避問住此次徐添德折竄

該處滋擾時訥音曾否實力堵剿與賊打仗抑仍
前退縮並未出力或又避往別處著勒保查明據
實具奏訥音昨已降旨派赴新疆換班其開縣一
帶勒保另派何人如何設法防堵之處亦著一併
具奏

十六日甲戌軍機大臣永瑆等奏言據勒保奏被

賊地方分別蠲免錢糧及更調召募兵丁一摺奉

旨令臣等議奏查川楚秦豫等省所屬州縣賊匪滋
擾之處或居民逃避耕種失時或賊匪去後甫
就安輯本年二月內欽奉

諭旨飭令各該督撫查明應徵錢糧現在有無帶徵
緩徵之項及本年春徵實數據實速奏至近賊
州縣或團集鄉勇或轉運軍需均資民力自應
一體分別核辦但現已早屆開徵之期未便延

緩應令勒保迅速查明卽一面出示停徵一面
據實覆奏俾閭閻得早沐

皇仁至傷病兵丁與其寄留各處調養徒資糜費自
應早令各回本省營伍以示體卹惟現當剿賊
喫緊之時缺額兵數較多或恐不敷剿捕之用
勒保請於四川山東兩廣雲貴等省照數另行
補派赴營自爲剿賊得力起見惟查兩廣地方

距川較遠若俟更調到營耽延時日既屬緩不
濟急且查前年各省召募新兵廣西一省未經
添募廣東一省亦僅添募兵丁一千九百餘名
似皆未便再行征調臣等思雲貴兩省距川較
近而雲南前年添募兵七千一百餘名貴州添
募兵一萬二百餘名四川本省則節次添募兵
丁二萬三千四百餘名應請令勒保通查隨征

兵丁傷亡遣回缺額實數除陝甘湖北河南等
省各有堵剿事宜補足之兵卽留本省應用其
山東雲貴等省按原調之數補派前赴軍營外
至兩廣應行補派之兵停其征調請令勒保查
照原數先儘四川就近添調如尙有不敷再於
附近之雲貴二省酌量添調奏入

上命軍機大臣傳諭勒保曰此時剿賊喫緊兩廣距

川較遠旣屬緩不濟急况現在軍營力加整頓辟
壘一新無難儘現有兵力迅勉成功軍機大臣請
於四川雲貴等省就近酌調以符更換之數所議
甚是惟朕聞向來綠營兵丁有滇黔勁旅之語而
黔兵尤爲趨健得力况勒保前在貴州剿辦狎苗
於該處將弁較爲熟悉更可期於應手而道途又
復捷近此次更調之兵莫若先儘貴州就近調派

如尙有不敷再於雲用兵丁內酌量派調但仍按兩廣兵丁額缺之數亦不得任意多調也

十七日

乙亥

明亮興肇奏言張漢湖一股賊匪經

臣等於涼沁河一帶痛剿之後該匪畏懼逃遁

連夜翻山由大嶺坡等處晝夜竄走臣緊躡其

蹤二十日趕至馬伏城適值陰雨泥濘探得賊

匪翻雪山暫紮山口臣星夜馳至該處官兵甫

欲下山賊匪蜂擁迎拒馬兵奮勇直撲殺斃五

六十人賊卽却走步兵從兩旁將欲抄壓賊衆

由樹林中迎出官兵鎗箭齊發賊匪始行亂竄

奔逃臣等督率追殺二十餘里沿途擒獲賊目

張敬等三十七名供稱從賊日久皆係打仗矛

手均卽正法張漢潮在山口一聞鎗聲卽催令

男婦奔走臣等跟蹤愈緊二十一日追至馬家

坪天已將晚該處山勢險要賊匪乘官兵紮營未定卽從山上衝下臣明亮督率愛星阿等帶

領馬隊由左手山腰搶上臣興肇同鎮臣長春

副將多爾濟扎普叅將楊奎猷等帶領步隊從右手抄擊賊衆分投抵敵放鎗拋石臣等督率

馬步官兵分四路仰攻殲賊甚多賊始翻山逃遁時已酉刻未便窮追獲賊張維志等十七名

僉供張漢潮因官兵追殺甚緊與冉學勝劉永

盛高玉春等商量埋伏誘官兵入山從上下壓

如能擊退官兵可乘間竄往龍駒寨一帶大村

莊地方擄掠人馬奔赴河南再作計議等語當

將該犯等嚮割

臣

等察其所向似走豫省無疑

卽由山陽商州大嶽迤漏夜繞出賊前杜其入豫

之路二十八日賊匪聚村地方正值賊衆在彼

擄掠遙見官兵卽上山四竄官兵追殺四十餘
里殲斃百餘人生擒賊目徐么兒等十九名訊
據供稱張漢潮說官兵馬箭不能抵敵祇可覓
險山躲避俟官兵馬匹缺少方可打仗等語當
將該犯等一併正法三十日趕至康家河前隊
兵勇忽遇山坳內突出矛手五六百人憑高下
壓長春同遊擊游棟雲應元寬等帶領廣東直

隸官兵直前轟擊

臣

明亮察看山勢右手有山

梁一道飛卽督率愛星阿侍衛莫新協領秦巴

圖總管都當阿等率領馬隊搶上該匪施放鎗

礮搖旗抵禦外委穆志雄首先衝入身受矛傷

陣亡長春馬受石傷滾下山坡復換馬帶兵衝

上游棟雲受有矛傷射死執旗賊日一人仍卽

帶兵搶上藍翎守備陳應彪藍翎外委樊豐年

均經受傷仍搶上山頂賊匪挺矛滾石臣等督

率馬隊並荊州湖北滿漢官兵一擁直上斃賊

百餘人賊始拋棄騾馬爬山遁走生擒張正昌

苟延春等五十四名訊據供稱張逆因連次被

剿傷人甚多若再往龍駒寨官兵追趕甚緊不

如折回到老林山內使官兵疲乏再看光景等

語該犯等均係襄陽人從張漢潮一同起事概

子駢誅

臣

等趁賊殘敗之時緊躡追剿初三日

趕至石洞子地方猝遇一股賊匪人馬亦多

臣

等一面差探張漢潮賊衆去向一面統領官兵

儘力擊殺殲斃賊匪二百餘名餘賊翻山由乾

溝逃竄被脅民人投出者百餘人生擒賊目黃

三皮等八十九名訊據供稱此股賊匪卽係去

年十一月內張漢潮在大河壩被官兵打散陳

三掌櫃領得三百餘人到處擄掠藏躲現共有一千餘人要尋張漢潮合夥等語查此內有抗拒打仗者立行梟示被擄者訊明釋放其餘四十二名解交鎮安縣陳瑞研審分別辦理適鎮臣關騰帶領一千五百名官兵到來因途遇此股敗賊就近剿辦_臣等思張逆股匪雖已窮蹙若兵分力單不能卽時撲滅且近日聞川匪兩

三股接踵入陝人數衆多若無官兵專剿必致

鴟張卽如此股賊匪正月間被臣剿散原止二

三百人會奏明交地方官搜捕今經兩月沿途

擄脅已有千餘人是以臣等將關麟所帶兵內

抽撥五百名派令遊擊夏福都司李燮元帶領

跟蹤追剿若日內歸併張漢潮股內更屬易辦

設該匪希圖寧綴官兵分投竄逸臣等已飛飭

各處防堵官兵探明賊蹤實力協剿自無難立
時撲滅奏入

上命軍機大臣傳諭明亮曰此次明亮察探賊情知
張逆欲走豫省卽由山陽商州大道繞出賊前杜
其入豫之路並跟蹤緊躡追殺四十餘里將該匪
截回此係明亮等之功其在康家河地方殺賊陣
亡之外委穆志雄著咨部議卹總兵長春馬受石

傷復換馬衝上山梁甚屬可嘉該鎮是否未經受
傷其遊擊游棟雲等於受傷後仍卽帶兵搶上山
頂誠爲勞苦出力如果再有奮勉之處卽以應陞
之缺補用至陳三掌櫃一股賊匪據明亮等奏稱
曾於正月間剿散原止二三百人今經兩月又有
千餘人此皆由該處地方官不肯認真出力致任
賊匪往來竄奔裹脅日多明亮等應查明嚴叅誅

一倣百則前堵後剿庶可尅日成功

十八日

丙子

勒保奏言查包正洪一股賊匪自南

山坪剿散之後連夜狂奔由渠縣一帶翻山竄
逸維時惠齡奉到

諭旨飭令回京額勒登保卽督兵趕緊進剿至嚴峯
灘地方接據川北鎮總兵朱射斗稟報蕭占國
張長更兩股賊匪復由閬中折回人數甚衆已

入營山地界額勒登保恐其在後牽綴不如迎
頭先剿蕭占國等更爲得力當率將領從靜邊
寺一路進發初三日午刻甫至駱市橋見左手
山梁屯有賊匪數百人額勒登保卽催前隊馬
步官兵奮勇競上斃賊一百餘名生擒李四兒
等二十三名訊據供稱蕭占國張長更本與包
正洪先後行走因包正洪竄赴渠縣官兵自必

跟蹤而去蕭占國約同二張長更均在觀音橋西
橋寺一帶屯踞俟官兵過後趕來抄襲後路先
派令賊目王盛帶領夥黨在此探聽等語當將
該犯等正法一面知會木射斗由大栢埡捷徑
追來一面親率鎮將於初四日五更由黃土墻
相機迎擊甫行十數里正遇賊匪排隊而來一
見官兵卽佔據山包五處放鎗迎拒我兵分爲

三路奮勇直上搶得山包兩處斃賊四百餘名
該匪等復退屯後面山梁副將孫大猷首先衝
上中鎗陣亡遊擊喜明藍翎領催彥不勒委官
訥音登額等率衆一擁而上賊匪四散奔逃我
兵由上下壓斃賊七百餘名追至石峩山賊又
踞險抵禦適朱射斗由雞喉寨旁路抄出兩面
夾擊又殺賊一千三四百名時已酉刻將賊匪

大隊逼上譚家山額勒登保率領朱射斗出遇
春等督兵攻剿該匪等捨命衝鋒額勒登保卽
遣人踣探譚家山後面均係峭壁懸崖無路可
竄因思賊匪旣據絕地我兵如攻剿稍緩轉恐
賊匪奪路下壓隨卽督率穆克登布叅將劉瑞
委防禦全保前鋒安楚拉委官倭楞泰等乘夜
奮力搶上山梁短兵相接賊匪力不能支立斃

八百餘名餘衆更形慌亂自相踐踏及滾崖跌
斃者一千四百名生擒賊目王宗光等八百
六十七名並有逃赴營山縣殺首者一百二十
五名搶獲騾馬二百餘頭賊礮鎗矛旗幟等二
千八百六十餘件訊之活賊供稱首逆蕭占國
張長更兩股共有七八千人連日斬獲殆盡該
首逆亦已殺斃當令賊目王宗光王之明田祖

連等指認屍身割取首級又令現獲各匪逐一
辦認僉稱屬實當將從賊日久之伍維同等四
百二十三名立時梟首其餘被脅良民訊明後
卽酌給銀米交營山縣遞籍安插此次通共擒
斃賊匪實有六千餘名其中被脅之人亦自不
少但旣經從逆抗拒且臨時無從分別不得不
痛事誅夷並非無辜濫及其冷添祿一賊賊匪

先由岳池竄入南充縣境經劉君輔帶兵追剿
嗣包正洪一股從渠縣奔竄亦距岳池不遠恐

劉君輔兵力較單

臣

即知會額勒登保帶領大

兵趕緊馳往岳池一帶併力剿捕並派朱射斗

帶領原兵在後搜捕餘匪至此次連日打仗陣

亡守備陳凡丁洪二員又穆克登布受傷二處

俱不甚重其餘傷亡弁兵容俟查明咨部其實

在奮勇出衆之將領弁兵俟查明另行奏請選
恩鼓勵再查徐添德一股賊匪自從大梁剿殺之後
由路陽壩一路竄過德楞泰於前月二十九日
趕至白橋山頂突遇賊匪衝撲德楞泰分兵兩
路迎擊追至蕩花嶺地方斃賊二百餘名生擒
劉顯奇等二十一名正在剿洗之際其大夥匪
衆復從兩旁山溝接應前來抗拒竟日即分

向雲安場大水田等處連夜奔竄德楞泰當與
阿哈保等率領馬隊星馳追躡又於團壩子一
帶趕上賊匪殺斃八九十名生擒王占文等四
十三名因恐該匪等竄至夔州與卜三聘等股
勾合闖入楚疆德楞泰卽由雲陽馳赴夔州迎
頭截剿遏其東竄之路其龔建一股前由巫山
折入大寧該處兵勇單薄經七十五抽撥兵勇

六百名協力堵剿其界嶺一路仍飭總兵德興
額隨時知會高杞扼要堵截奏入

上諭內閣曰勒保奏官兵剿捕蕭占國張長更兩股
賊衆全數剿獲淨盡此皆仰賴

上蒼默佑

皇考威靈覽奏曷勝欣慰此二股賊匪從前在白巖山
與林亮功合夥林亮功鎗斃後卽各自爲首到處

焚掠滋擾此次該逆匪等由闔中折回經額勒登保率領將弁兵丁連次截剿將賊衆逼上譚家山額勒登保等復督率弁兵乘夜搶上山梁痛加剿戮賊匪斬獲殆盡賊首蕭占國張長更均經殲斃所奏打仗得勝情形實爲認真剿辦非從前之虛報首功粉飾具奏者可比額勒登保病體初愈卽奮勇帶兵轉戰直前實屬可嘉之至前此惠齡德

楞泰止擒獲冉文儁一犯而川北地方尙有竄出
餘孽未能剿淨曾經加恩各賞給頭等輕車都尉
世職今額勒登保剿除兩股賊匪殲盡無遺厥功
尤偉額勒登保着加恩賞給一等男爵世職至勒
保係經畧大臣此次雖未親在行間亦由其調度
得宜而於投出被脅良民酌給銀米遞籍安插所
辦尤爲妥協勒保着加恩賞給喜字玉搬指嵌松

石金盒大小荷包繡火鏢包額勒登保亦着加賞
喜字玉搬指嵌松石金盒小佩包繡火鏢包其打
仗受傷之總兵銜穆克登布着交部從優議敘隨
同帶兵出力之總兵朱射斗楊遇春叅將劉瑞遊
擊喜明防禦全保前鋒安楚拉藍翎領催彥丕勒
委官訥音登額倭楞泰俱着交部議敘陣亡之副
將孫大猷守備陳凡丁洪俱着交部議卹此時各

路領兵大小諸臣經力加整頓之後看來皆有起色勒保身膺重任惟當倍加感奮卽如伊弟永保從前在鍾祥縱賊罪無可辭經朕破格錄用復令署理陝西巡撫所以施恩於伊兄弟者原不過爲國家公事勒保等若能迅勉成功則軍營從前諸弊不但一槩從寬仍可加之懋賞倘伊等無福承受則國憲具在致朕不得不爲已甚亦由伊等自

取朕亦無所容心也

十九日

丁丑

廣厚奏言川匪張映祥竄入階州分

擾兩河口等處

臣

得信卽行馳往行次太石山

接據富成札知在毛堖山梁連次剿殺殲賊甚

多賊匪因不能竄出白馬關卽由草川分股先

後向西竄赴旺則關一帶並探聞已有一股賊

匪在中寨子地方焚掠

臣

惟兵前進距中寨子

數里見有探路騎馬步行之賊共九人當卽殲
斃四人旋見賊黨蜂擁而來適吉蘭泰正帶兵

趕到臣卽帶領官兵從右進擊吉蘭泰從左進

擊斃賊十餘名賊又抵死向前臣等督率將備

奮力截殺又射死執旗賊目一人殲賊數十人

賊匪漸形慌亂我兵乘勢趕殺又斃賊約百餘

人生擒侯自升等四人兵勇亦傷亡二十六人

賊卽翻山亂竄由安化壩向西奔逸其大股竄
至旺則關之賊據富成知會斬獲多名亦由安

化壩西竄與前股俱奔赴柳壩等處富成卽由

米倉山追剿臣查階州地方山徑分歧賊匪狡

猾冬端時分時合牽綴官兵臣與吉蘭泰若隨

同富成一路躡追轉恐不甚得力當與吉蘭泰

酌商卽由黑崖山小路截擊以期與富成兩面

夾攻趕緊殲除奏入

上命軍機大臣傳諭明亮恒瑞興肇廣厚日張映祥
股匪因被官兵連次剿殺分投奔竄廣厚以階州
山徑分歧現與吉蘭泰由黑崖山小路截擊以期
與富成兩面夾攻所辦俱是但廣厚吉蘭泰究因
兵力不多是以未能痛加剿殺此時明亮等由商
州繞出賊前截剿張漢潮一股正在跟蹤緊躡務

須加倍努力迅速肅清一俟此股竄匪剿除明亮
不必卽赴川省勒保處現有額勒登保德楞泰等
在彼帶兵明亮應與恆瑞等將陝境各股竄匪先
行剿淨再帶勝兵前赴甘省秦階一帶幫同吉蘭
泰富成等將張映祥一股併力擊剿迅速辦竣總
須陝甘兩省全境廓清明亮興肇再赴勒保軍營
剿辦川省各股賊匪明亮恆瑞興肇如能將陝甘

境內之賊全數掃除卽屬伊三人之功倘仍令蔓
延則責有攸歸亦惟伊三人是問至廣厚摺內所
稱富成在毛堖山梁殲賊甚多又在旺則關斬獲
多名究竟殲賊若干是否確實何以未據明白聲
敘現在張映祥向西奔逸其迤西一帶係何地方
曾派何人在彼堵截並着廣厚詳悉具奏

二十一日

巳卯

上命軍機大臣傳諭勒保曰前因剿捕教匪全在剿
撫並用叠經降旨訓示以正賊不可不誅良民不
可不撫令勒保悉心籌辦今已閱多日雖節次打
仗摺內亦間有臨陣投出者究未聞風踴躍爭先
來歸賊中黨與未全解散自由勒保辦理此事不
過騰黃張挂出示招徠附近地方百姓雖已聞知
而被賊裹脅良民仍隨賊匪驅使往來奔命於如

何撫綏安輯之方未能深知周悉若退避則懼爲
賊戕投出又慮干法網是以徘徊觀望仍前結聚
雖有招撫之空談總未能收解散之實效其應作
何廣爲宣諭使賊中難民咸各聞知之處勒保務
須設法籌辦開示公信俾其翕然樂從不可以出
示具文了事倘有被脅民人果能自相糾結暗約
多人將賊首如冷添祿徐添德李全高均德張映

祥張漢潮等縛獻軍門者勒保卽當優加獎勵指
名具奏不但免其從賊之罪並當酌賞七八品頂
戴以示鼓勵而勸來者切不可攘爲己功亦不可
巡護前過致阻其去逆歸順之意此事章程前會
令勒保與馬慧裕及同知劉清悉心妥議伊等有
何見解及現在如何辦理情形何未據奏及再此
次教匪起事根由始於達州朕聞彼時有知州戴

如煌居官貪劣以致激成事端但戴如煌是否因
老病無能任聽官親幕友長隨等從中擾害地方
抑係伊任意貪婪自有實在劣蹟會聞戴如煌與
川東道李憲宜係屬鄉親爲之詳請告病嗣經

稟考察見規避情由未曾允准將戴如煌革職仍留軍
營効力此時戴如煌自必尙在川省伊係業經革
職之人着勒保卽將以上指出情節向其切實訊

問據實具奏此係前任英善宜綿任內之事勒保
可無庸稍存袒護又朕聞達州尚有吏目一員尤
爲貪婪不職但未記憶姓名亦着勒保將該吏目
係屬何人有何劣蹟是否仍在該處有無被賊戕

害之處一併嚴查審辦再知縣中趙華方積二員

素稱能得民心趙華前已據劄保奏明仍留新寧
署理縣篆方積陞授西陽州知州該二員如果始

終奮勉實心任事仍當據實保奏量加鼓勵再前
此惠齡擒獲冉文儔羅其清此次勒保擒獲蕭占
國張長更詳閱摺內帶兵出力之人多係營員而
由京派出之健銳火器官員兵丁以打仗出力刻
名保奏者寥寥無幾豈勒保等以伊等由京派往
之人設遇傷亡必須指名具奏非如營員鄉勇之
止須咨部辦理者可比竟不令其身臨前敵若果

存此見何以勵將士而肅戎行但又不可因有此旨卽將伊等無論出力與否竟成輪班保奏以致冒濫功蹟倘伊等疲玩不前亦不應姑容闕住也又前據勒保奏訥音所帶健銳火器兩營兵丁疲病較多令訥音六十七帶領回京旋因訥音派往新疆換班卽令六十七帶回此兩營兵丁應否仍須由京派往頂補之處未據奏及並著勒保酌量

情形一併覆奏

臣

等謹案惠迪吉者共由之理欲並生者併
包之量蠹彼蚩氓爲賊所脅陷於逆黨本

王法所不容乃蒙

皇上寬仁彰信登

諭剿撫兼施准予貰罪自新今以聞風解散者少惟
慮承流宣化之臣或視爲具文

申命籌辦撫綏俾洗心革面者咸知翕然來歸雖舜
干之格七旬湯網之開三面不是過也至於
吏治醇疵實關民生休戚若戴如煌等之居
官貪劣及趙華方積之素得民心一一均邀

睿鑒

勅令查奏彰善肅惡正以樹厥風聲而京營隨征弁

兵並

論核實保奏賞_不濫而勞必均

綸音所沛纖悉周足使聞者感畏頑梗潛消也

欽定剿平三省邪匪方略正編卷九十四 己未年

三月二十二日 庚辰 恒瑞奏言 臣 欽奉

諭旨以張漢潮老病無能之賊得以從容游奕七八

百里內無一兵將接應著 臣 確切查明係何人調

度失當據實叅奏 臣 查自上年九月間陝境肅清

後提督王文雄總兵慶溥柯藩關騰官信等帶

兵在陝境南界堵禦聲勢尙爲聯絡自十一月

內川匪李全唐明萬唐大信樊人傑龍紹周等
分股竄至紫陽西鄉一帶王文雄與各路鎮將
均在東路截剿適張漢潮一股由城固躡淺過
江北竄明亮與肇跟蹤追剿宜綿秦承恩先後
派令關騰官信遊擊邢承誥守備尙其倫等帶
兵均赴漢江以北分路堵截其漢江以南一千
三四百里惟王文雄慶溥柯藩帶兵防堵幸

臣

白川帶兵回陝卽在南鄭城固一帶要隘聯絡

聲勢本年二月間因張映祥等匪由廣元竄近

寧羌臣卽帶兵向西截剿而紫陽安康邊界之

賊又復北竄慶溥柯藩兵力稍單王文雄將漁

渡壩竄匪逼剿出境後亦卽趕赴紫陽策應是

以彼時中間相去七八百里無兵接應臣現因

真武宮賊匪復竄南江豆腐渠一帶切近南鄭

邊卡

臣

又馳回青石關探蹤迎擊慶溥柯藩已

節次將紫陽安康竄匪痛加剿殺逼出陝境王

文雄亦移兵罐子山適中駐紮刻下與

臣

相距

僅二百餘里伏查宜綿年老多病秦承恩又係

漢人不諳軍旅以致調度未能周密今據總兵

關騰來稟已隨同明亮一路剿辦至總兵官信

業經

臣

忝奏在案那承諾尙其倫帶領兵勇二

千餘名總未見其奮勇打仗俟查明另行辦理
再查有漢中府留養傷病之吉林黑龍江等處
官兵內有已成殘廢難望痊愈者既不能隨營
打仗自應遣回若俟咨報勒保處辦理未免往
返需時是以卽派西安協領額爾啟道員文需
逐名查驗所有實在殘廢之副總管托倫太一
員兵丁五十七名並陣亡兵丁骨殖五十二副

交文需照例辦理送回並酌派二等侍衛德勒

克依管帶進京由兵部送回原省再跟隨臣之

護軍校本布善亦患病日久並令回旗調理奏

入

上命軍機大臣傳諭恒瑞曰恒瑞覆奏查明紫陽安

康邊界一帶中間相去七八百里無兵駐守一節

用兵之道全在聲勢連絡庶首尾相應今乃千里

無兵任賊游奕皆由宜綿秦承恩在任時一味畏
愆退縮毫無布置以致將士無所遵循賊匪日益
縱肆除總兵官信已據叅革外遊擊邢承誥守備
尙其倫據稱打仗未見奮勇卽着恒瑞確切查明
該員等畏縮實情據實嚴叅示儆其養傷之吉林
黑龍江官兵查明實在殘廢者派員管帶進京咨
送回籍所辦甚是再前因官兵在唐藏地方剿賊

遊擊蘇維龍失利不知下落會降旨飭查昨據陸
有仁面奏蘇維龍從前在該處駐守年餘擊剿賊
匪屢有斬獲保障村堡民賴安全遂爲賊匪之所
忿恨此次在彼堵剿實因兵勇數少同時潰散該
遊擊猶復步行殺賊迫力屈被傷痛罵賊匪致被
截舌分尸罹禍甚慘經該處居民尋其齒豁分盛
埋掩如果情形屬實則此等出力之員自應優加

旌獎以慰忠魂而鼓士氣著恒瑞卽行詳悉查明
覆奏候朕施恩

同日護理陝西巡撫馬慧裕奏言

臣欽奉

諭旨令將陝省撫輯情形詳議具奏

臣

查陝西之南

山四川之川東川北湖北之荆宜襄鄖河南之

盧陝浙鄧一帶山勢相連廣濶四五千里建置

之初因係地處萬山之中磽确瘠薄是以設官

分土視平原較爲寬廣竟有一州一縣週圍一
千餘里及二千里不等地方官有鞭長莫及之

勢

國家承平日久生齒日繁地角山頭開墾殆遍其
地水泉充足易種易收其人安逸無事因而編
造謠言托詞於消災祈福愚民爲其所惑日聚
日衆歛錢肥己其倡首者或家道小康因而不

肖官吏及地方無賴之徒乘機訛詐迫以難堪
以致激成事端若輩敢於

光天化日之下妄肆鴟張

天戈所指自當淨絕根株但必賊匪果與官兵接仗
不難盡數蕩平乃恃其生長山中翻崖越嶺捷
如猿猴所過村庄市鎮肆行焚掠隨地是糧去
來自便官兵執持軍器又需裹帶乾糧行走不

如賊之捷速安能步步趕上至於兵行糧隨山
徑崎嶇需用人夫背運負重入山更爲遲緩且
遇風鶴之驚人夫一閃而散倉猝之間不能繩
以官法甚至賊匪折回兵在賊後糧在賊前彼
此不能相顧迨賊去稍遠再行招集僱運已屬
緩不濟急在追剿之時惟恐糧運遲悞預行折
給錢文本可買食無如山中店舖本少賊至率

皆遷避是以兵丁往往有受饑之時卽有時與賊相遇我兵奮勇直前擊之於北則竄而南截之於東則折而西蹤跡靡常無非疲我士卒之計臣前在河南解馬至襄陽其時軍興甫及二年所見豫省防兵楚省戰兵均有狼狽之狀此次到漢中見兵丁更形疲乏至陝西防守一事自寧羌至平利與川省交界綿亘二千里賊匪

隨處翻越山梁不由隘口萬難處處排設多兵
各屬鄉勇止可用助聲威若令陷陣衝鋒實不
足恃是防守亦不能不仗兵力

臣

查漢中之兵

除傷病外止有六百餘名又係各省各營零星
攢湊及留養病痊之人將官除遊擊蘇維龍已
經陣亡外止有都守三員俱不諳習戰陣寧羌

沔縣南鄭城固一帶各隘口俱派鄉勇防守設

遇賊匪竄近卽令都守三員將六百餘名之兵
全行帶往尙恐不敷堵禦臣現囑令道員文需

及各道府並地方官將所集鄉勇勤加訓練使
之稍知紀律以助兵力訪之各路軍營情形大
概相同自應設法辦理以期迅速歲事查安撫
之說從前亦有議及者蓋賊黨喪去良民無不
思歸卽實係教匪亦未嘗無悔心之萌特慮及

逃回被獲卽行正法是以進退維谷不得不隨
同首惡往返奔馳以冀苟延殘喘今蒙

聖慈網開一面並籌及目前何以食之將來何以居
之是若輩於萬無生理之中竟得保全軀命豈
有不爭先恐後者哉惟是安撫之難甚於剿捕
益剿捕雖尙未成功終有殄滅之日安撫尙稍
有未善不免餘孽之留惟有宣布

皇上法外之仁使之深信不疑翕然來歸旣撫之後

又復使之各有生計方爲妥善

臣

才識庸愚情

形未能深悉不能剴切發明以備

採擇謹就管見酌擬十一條敬爲我

皇上陳之一請預行刊發簡明告示以廣勸化並設

安撫營使之有所趨向也查教匪滋事以來每

次拏獲賊人亦多供稱情愿投出祇因人數太

多難以安頓恐被誘出盡遭屠戮將來無所逃
生是以觀望不前等語應請將此次欽奉

上諭除敬謹謄黃外再以方言里語宣布

皇上如天好生之德刊發告示在於市鎮村莊遍行

粘貼務使人人通曉惟是帶兵大員一面剿捕

一面安撫恐生賊黨疑慮之心若派微末員弁
經理其事不足以資彈壓而致信從應請於川

陝楚豫之地各設安撫營一二處或三四處每
營撥給精兵千名

欽派大員一人督辦招徠安撫之事以專責成各給
千

欽差安撫使關防凡投出者毋許官兵鄉勇擅行殺
戮並示以半年之內自行投出者概免其罪安
爲安插如能勸諭數人及數十人投出者卽分

別賞資銀錢頂戴各隨其願或能帶領一股投
出無論被脅之民及曾經習教之人均卽分別
賞以職官

奏請叙用如過期仍然怙惡不悛者擒獲之日斷
不寬宥一請設立腰牌黃旗以便稽查也投出
之人官不給以憑據不足以釋其疑而堅其信
應請各給腰牌一面上貼

欽差安撫使關防印花印花上墨寫自行投首遵

首免死等字樣陰面註明姓名籍貫年歲及每日應

支口糧若干沿途赴官請領等字樣其攜帶眷

口貨財者腰牌之外另給黃旗一面將眷口貨

財寫於旗上亦貼關防印花不許與外人結伴

先行通傳各路關津卡隘兵役人等遇有執持

腰牌黃旗之人驗明放行仍掛號備查不許留

難阻滯自然歡聲載道黃旗到籍時官爲收繳
其腰牌毋庸查追一請出示投出之人先令棄
去器械以辨真僞也查賊匪敢與官兵抗拒恃
有器械今旣遵

旨宣諭投出免死則器械爲無用之物應請先行示
令將一切火藥鎗礮刀矛旗幟均行棄去每起
不得過五十人赴營投首挨名造冊給以腰牌

携眷者給以黃旗並酌賞盤費立即遣令起程
再傳二起發給腰牌黃旗酌賞盤費如人數多
至數百執持器械蜂擁而來必係心懷叵測卽
用鎗礮轟擊庶於安撫之中仍寓防範之意一
請投出之人遣令回籍毋庸兵役護送以釋驚
疑也查投出之人有實係歸誠者亦有因黨與
日散勉強順從者既給腰牌黃旗令其沿途自

行赴官請領口食自與遞解軍流人犯不同若
復過於鈴束必生驚疑應請止令沿途保甲派
撥人夫逐段照料以利進行毋庸派撥兵役逐
站護送若驀地潛逃或滋生事端自係怙終不
悛卽令地方官分別辦理且報存案一凡係同
鄉同村人同時投出人數過多應令間日行走
每起不過三十人以免擁擠也查安撫之事開

誠布公原可無庸過於防範致滋惶惑但同鄉
同村之人同時投出或數十人及百餘人中途
既無管束難保不恃其人衆滋生事端應請就
其人數多寡均勻配搭或間一二日或間三四
日先後行走則人少勢孤不致別生事端一請
口食從厚並到籍後分別安頓以示矜全也查
被脅之人明知罪在不赦無如蹂躪之後生計

蕩然是以隨賊擄掠苟延旦夕若投出之後仍
係嗷嗷待哺勢難望其安靜應請照賑卹之例
甫經投到散給粥饑起程回籍酌賞盤費仍按
大口小口沿途從優支給口糧住宿給以廟宇
俾無窘乏之苦次日催令起身毋許停留其到
籍後令地方官查明有業無業將作何安頓之
處逐細詳報該管上司嚴行稽查毋致失所有

業者自行經理倘原業被人侵佔稟官追給其
無業者或派充衙門夫役或與軍流各犯一體
支給口糧或查入官之業產分給耕種計畝納
租或酌分現任大小文武官員及在籍紳衿之
家服役力作以資養贍仍由該地方官發給執
照此外安置之法因地制宜不拘一格總當令
其餬口有資棲身有所自不致流蕩爲匪一請

凡老幼婦女殘廢之人分別安插以免失所也
查老幼婦女殘廢之人凡有丁男挈帶回籍者
胥聽其便倘係無家可歸無人可倚若強令就
道亦非所以示體卹應請將年老及殘廢之人
分撥附近各州縣支給孤貧口糧以終天年其
婦女幼孩卽勸諭仕宦之家殷實之戶分領養
育以供使令不定主僕各分仍由官發執照庶

幾不致流離一年少單身之人無家可歸不願
回籍者請另爲設法安置以免向隅也查年少
之人來從賊黨不必盡皆遊蕩或本係孤苦或
被脅之時室廬灰燼骨肉分離與其遠歸而無
所依不如異地謀生尚可度日但不得聚於受
撫之地致留後患應請分撥向無邪教各州縣
設法安置給予腰牌自行齋投口糧盤費一體

支給仍於投到時由該州縣將作何安置之處具文報查一凡賊巢距安撫營較遠之處間有私自逃出者請設法安置以昭畫一也查私從賊巢逃出之人如果並未夾帶字跡執持器械均係自知守法改過自新之人應請出示近十者赴卡近城者赴城兵役人等不得留難阻滯立即帶交地方官查問明白給以印花腰牌寫

悔罪自新遵

旨免死等字樣或回本籍或他往依傍親友給以執照令其自行資投該地方官交保管束與商民一體營生無庸官爲安置仍造冊申報並於朔望查點倘或結黨成羣滋生事端卽行分別辦理一投首之人回籍後請嚴禁挾仇訐告以省拖累也查此次奉

旨撫輯出自

皇上法外施仁皆可望其改過自新共享

昇平之福有指首曾經從賊者應請以告

赦前事論是已投者脫然無累未投者亦無不欣然
來歸一教匪頭目悔罪投首者仰懇

聖恩暫行寬宥以格愚頑也查教匪頭目果實有惡
才實有邪狹一經擒戮賊黨無所統屬自必紛

紛若鳥獸散今各頭目盡係愚頑之徒惑眾歛
錢並無惡才邪術連年擒殲之賊目已多而賊
數仍未減少蓋官兵乘勝殲戮之時賊黨人數
尙衆又各於其黨中推一頭目可見無足輕重
若賊目悔罪投誠立即正法不但賊黨中益堅
負隅之念而被脅之人更必受其禁錮無從投
出應請設立安撫營之後如果頭目詣營自首

由督辦大員面加詢問察其真偽或厚加犒賞
或假以詞色或令寄信邀約或令回巢遍傳陽
示以不疑而陰防其不靖俾賊黨咸知著名元
惡尙得仰邀

寬典自不致有所遲疑似於安撫之法更爲周密至
頭目究係獲罪重大之人應俟大局完竣之後
將作何辦理之處請

旨定奪以上十一條臣與各寮屬悉心講求又復體

察輿論意見相同是否有當伏請

訓示奏入得

旨軍機大臣悉心妥議具奏

二十五日

癸未

勒保奏言查額勒登保一路官兵

於三月初五日自譚家山將蕭占國張長更等

兩股匪衆辦完後臣卽知會迅領大兵乘勝趕

赴岳池一帶剿捕冷添祿並包正洪等股竄匪
暫留朱射斗在後搜捕餘孽嗣額勒登保由營
山蓬州一路進發行抵玉屏山探得包正洪一
股已在大竹境內與儀隴竄來之賊匪張子聰
合夥均竄入隣水縣境而冷添祿尚在岳池地
方游奕雖經劉君輔帶兵追躡未能得手額勒
登保由間道督兵連日冒雨遊行於初十日未

刻行抵荀角場適劉君輔趕到探知冷添祿正
在前面悅來場一帶屯聚額勒登保以該匪等
尙未知有大兵正應出其不意迅速進擊當派
總兵楊遇春等爲一路總兵銜穆克登布爲一
路各於左右山溝內密往抄截先令劉君輔帶
兵前往誘敵額勒登保卽親督侍衛將備等由
中路前進劉君輔甫行六七里忽有賊匪前來

抗拒連放鎗礮並有騎馬之賊往來衝突額勒
登保催兵競進衝入賊隊殲斃多名賊勢頓却
我兵乘勢掩殺追至廣安州屬城頭堰地方適
侍衛噶喇等帶領馬隊由左路抄出護軍叅領
格布舍等帶領馬隊由右路抄出殺斃騎馬賊
匪四十餘人該匪等無路奔逃紛紛散竄立斃
三百六七十名生擒龍典禮等七十三名當據

獲賊供稱冷添祿自祖師觀竄出祇有六七百人因徐添德合夥又撥出戰手一千餘名隨同冷添祿行走嗣於正月間在鑼鍋塢分夥卽向隣水岳池定遠南充一帶往來奔竄沿途又逼脅多人統計實有三四千人今日冷添祿說劉大人帶兵不多我在悅來場等候倘能將官兵打退免得又來追趕先令賊目劉朝選率領男

婦二千多人在前行走冷添祿與賊目符日明
挑出戰手一千餘人在後埋伏預備抄截官兵
不料大兵驟至追到城頭堰殺死多人冷添祿
中箭墜馬我們卽被擒獲等供額勒登保當令
該犯等於積屍內尋取冷添祿屍身係被亂矛
戳死辨認屬實當將該犯首級解到臣營經臣
傳令熟識該犯之人認明無異因探知前股匪

衆向蕭家溪竄去額勒登保卽於十一日督兵
進剿至場坪竿獲落後賊匪訊知劉朝選符曰
明率衆狂奔要由大竹一路竄出找尋包正洪
等合夥額勒登保卽督率楊遇春劉君輔穆克
登布等分路截擊至茶坪壩時已晌午遙見石
筍河聚有賊匪正欲過河我兵三路并到將賊
衆全數逼至河沿痛加殲殺該匪無不慌亂撲

河淹斃者不計其數其在沿河殺斃者統計八

百餘名生擒男婦七百八十一名口除將從賊

日久之吳亦云等三百七十五名立時正法其

餘被脅難民均交廣安州給與銀米遮籍安插

賊目符曰明業經殺斃惟劉朝選尙無下落是

否一併殲戮現在確查不使漏網守備趙祥候

補千總譚一洪受傷陣亡弁兵內亦間有傷亡

俟查明咨部其出力之吉林索倫滿漢官兵現

據額勒登保閔送前來另單保奏臣現已知會

額勒登保速即帶兵由隣水一路進剿包正洪

張子聰等匪衆以冀尅日掃平再赴川東剿辦

別股又朱射斗前在營山一帶搜捕蕭占國餘

匪節據搜獲一百餘名均交營山縣審辦臣恐

此次冷添祿駭匪尚有零星逃逸者仍飭該鎮

卽在廣安岳池境內帶兵搜捕以期淨盡

勒保又奏言查川陝交界地方自廣元以至太平綿亘一千餘里處處有路可通陝境自不若湖北之與川東接壤者祇有巫山大寧兩處可以扼要堵截况楚境現無賊匪該省督撫祇須相度地勢在昆連川陝各要隘多撥兵勇嚴防卽足以捍衛巖疆則重在堵而不在剿至陝省

現有賊匪紛竄地方又復遼濶勢不能逐處安
兵制其奔逸之路則當堵剿並重今恒瑞所奏
王文雄等駐兵處所與恒瑞相距七八百里中
間并無兵將接應亦屬實在情形然欲聲勢聯
絡處處添兵不特無此兵力而路徑叢雜若賊
又乘間潛逃仍屬有名無實果能於有兵堵禦
之所遇賊卽行痛剿該匪等自難竄越卽或於

無兵空隙之處奔竄而帶兵大員實力截殺不予以暇痛打一二仗之後賊勢窮蹙再得一路勁兵爲之截擊自易得手現在永保到營

臣連

日與之悉心籌畫並察核陝省地勢賊情查張漢潮在五卽孝義一帶明亮跟蹤剿辦龍紹周樊人傑等在西鄉紫陽一帶王文雄柯藩慶溥等帶兵堵禦張映祥一股在畧陽階州一

帶有恒瑞富成兩路夾攻以各路之兵剿堵各路之賊尙覺不敷而秦承恩前在漢中帶兵祇有六百名因派往鳳縣堵賊失利所存不過十分之六更不足恃今永保仰蒙

皇上逾格天恩署理陝西巡撫正當勉力殺賊立功但僅以單騎馳往仍不過於一路軍營內多添一人亦屬無濟於事自應酌籌兵力備其剿堵

之用查川省正當剿賊萬緊之際德楞泰一路
賊勢較重卽額勒登保現已辦完三股而尙有
包正洪等股餘黨亟須併力殲除刻下亦斷不
便卽行抽派臣現駐白塔壩山梁原有官兵二
千餘名以備策應茲卽於此內撥出陝甘兵一
千餘名派往陝省第爲數尙少因查前此遵

旨更換傷亡缺兵案內山東省有應調兵丁一千餘

各臣現又飛咨山東撫臣催令迅速調派起身

並囑永保於此項官兵過陝時就近留用至陝

省亦有應換缺兵臣因該省現有軍務本未調

取並令永保於到任後卽體察情形於各標營

內酌量抽調雖此項添調兵丁不免稍需時日

而到營後湊成一隊均係生力之軍卽可探明

何路緊要赴何路辦理可期得力正在籌辦間

適接明亮知會亦因兵力不敷囑令於川陝兩

省內籌撥官兵二千名臣亦告知永保一到陝

省或將現在派出之兵先撥明亮一路以資接

濟俟山東及陝省調補之兵上緊催齊卽速帶

領或赴明亮一路或赴別路協剿臨時相機辦

理再查西安副都統觀成平日打仗辦事尙屬

勇往幹練近因病後兩耳重聽帶兵不甚得力

是以臣派令在夔防守茲陝省剿賊吃緊西安

亦關緊要臣現飭令該副都統將夔郡剿堵事

宜交與七十五接辦卽速起身回至西安以資
彈壓又三等待衛侯圖桑阿現在漢中間其老
病侵尋不能帶兵應請令回京以節糜費

勒保又奏言臣欽奉

上諭嗣後剿辦賊匪總宜以勁旅當先率領鄉勇又

教匪聚眾叛逆陷城戕官實屬罪大惡極爲王法所不宥不得徒事招降等因查鄉勇一項本係齊民甫經充募祇可防守卡隘誠難望其禦賊衝鋒蓋緣此次軍興之始調派官兵無多不得不藉鄉勇以壯聲勢嗣因用兵日久鄉勇等經歷行陣漸覺諳練並又熟悉路徑而帶兵各員或以兵力不足或恐兵丁損失過多責令鄉勇在

前打仗此等情弊難逃

聖明洞鑒自

臣

接辦後留心察看鄉勇中得力者固

不乏人無用者亦復不少因各路兵力不敷未

便概行裁汰當經通飭查點將勇健之人酌留

調用其不得力者全行裁撤又復節次嚴飭帶

兵鎮將凡有隨征鄉勇或令探聽賊情或令作

爲嚮導打仗時祇許在後助戰毋任臨陣當先

現在額勒登保德楞泰兩路官兵每遇打仗俱
係吉林索倫馬隊在先滿漢官兵步隊接踵並
進實無專令鄉勇衝鋒之事至軍行之次原可
剿撫兼施但招撫祇在脅從逆黨卽未便輕賞
至各首逆罪大惡極更爲法所必誅若徒以解
散爲事或將久經從逆之犯並首先傳教之人
概行釋放不特無以服衆且恐安插後反側潛

萌轉貽後患

臣

自辦理軍務以來本重在剿而

不在撫凡習教從賊並曾經殺人放火者無不

立于駢誅惟實在被脅難民迫於勢不得已者

訊明後始行釋放酌給銀米交地方官妥爲安

插斷不肯意在招降致涉寬縱至剿賊固以擒

渠爲重然擒首逆而夥黨未盡聽其遠颺其中

强悍者又各自爲首聚衆蔓延名雖殲厥渠魁

其實大衆具在於大局仍無裨益官兵如果痛
加剿捕將其黨與悉數殲除縱使首逆尙存亦
屬孤立無助不難弋獲况從前欲將首逆解京
帶兵各員往往於剿捕得手之時注意生擒轉
致兔脫今荷

聖明燭照機先飭令不必解京而冷添祿蕭占國張
長更等均得臨陣殲戮將各首級傳示犯事地

方無不共見共聞咸知儆懼臣嗣後惟有嚴飭
各路領兵大員殺賊則勁旅當先獲犯惟脅從
罔治以期將士用命教匪全除均奏入

上諭內閣曰勒保奏官兵剿捕冷添祿一股賊匪首
逆全行掃蕩此皆仰賴

上蒼默佑

卓老威靈覽奏曷勝欣感冷添祿股匪上年自祖師觀

竄出後又復到處奔匿日久稽誅今勒保因額勒
登保剿滅蕭占國等股賊匪完竣後卽知會額勒
登保帶領勝兵乘勢剿捕得以迅就蕩平勒保調
度得宜能得人心使將弁等皆知感恩報効實不
負經畧大臣之任深堪嘉獎至額勒登保前於病
體初愈時卽將蕭占國張長更兩股賊匪全行辦
竣茲於途次一聞冷添祿在岳池地方游奕之信

卽由間道督兵連日冒雨遶行趕抵賊巢出其不
意痛加剿殺冷添祿中箭身斃額勒登保又復乘
勝將餘匪撲滅淨盡旬日之內殲除三股賊匪實
爲奮勇可嘉不愧認真出力之大將前已加恩賞
給二等男爵世職著再晉加一等男爵其從前恩
賞銀一萬兩未經完繳者免其著追其隨額勒登
保打仗之吉林索倫滿洲綠營兵丁著勒保查明

普賞一月錢糧以示鼓勵至軍營出力各員內如
護軍叅領格布舍孫薩克丹布之子烏鎗最爲精
熟朕所深知足見所保公當已另降諭旨俱照所
請加恩矣從前各路帶兵大員祇圖擒拏首逆仍
任餘匪竄逸以致一股未平一股復起迄無竣事
之期今於旬日內連辦三股賊匪不留餘孽從此
剷淨一股卽肅清一處可望成功朕佇盼捷音踵

至也

上又諭內閣曰軍營節次打仗出力人員護軍叅領
裕布舍著賞給副都統銜三等侍衛噶喇著陞爲
二等侍衛吉林佐領德林保著賞給珠克圖巴圖
魯名號驍騎校綽布通阿著賞給訥爾吉巴圖魯
名號前鋒全保著賞給伊勒達穆巴圖魯名號黑
龍江領催哲勒格訥依著賞給伯琪禮克巴圖魯

名號彥丕勒著賞給齊達勒台巴圖魯名號總兵
銜叅將穆克登布著賞給濟特庫勒台巴圖魯名
號遊擊喜明著賞給騰琪台巴圖魯名號把總梁
揚光著賞給綽克托巴圖魯名號仍照例各賞銀
一百兩成都佐領阿郎阿黑龍江驍騎校烏圖依
遊擊張明德都司王兆慶守備劉健標周官均著
賞戴花翎守備鄭三貴著賞換花翎吉林領催伊

勒彰阿明女前鋒伊克精阿安楚披甲訥音登阿
倭楞泰赫特恩保烏進保穆克德布德爾奇善黑
龍江領催固寧阿彥濟勒披甲凱瓦勒圖額依布
臣烏爾圖訥蘇綽丹保滿都禪打牲餘丁彥濟保
成都驍騎校忠靈守備馬正元千總廖世俊王兆
龍王百齡楊春榮王泰把總汪廷舉呂應揚王學
閻吳振亮馬起龍陳瑾外委楊宗禮陳祖榮額外

外委吳廷楷李珍張超李得徐國明兵丁陳大雄
甘勝發羅輔馬獻唐文貴安定邦溫芝蘭劉丕振
潘棟王朝柱李得勝鄉勇頭目李和周貴俱著賞
戴藍翎以示鼓勵

上命軍機大臣傳諭勒保曰此次教匪蔓延日久裹
脅日多不得不議剿撫兼施之法但必將首惡逆
黨痛加殲戮使之知所震懾方足堅其畏罪遷善

之心今勒保奏稱祇應撫其脅從其意以剿辦爲重所見甚是至陝省堵剿事宜所稱王文雄與恒瑞駐兵處所相距七八百里中間並無兵將及漢中止有兵丁六百名之處前據馬慧裕籌辦撫綏摺內亦會奏及陝省情形現交軍機大臣酌議其所需更換山東兵丁亦降旨令岳起照數挑派迅赴軍營聽候應用惟在勒保察度情形隨時酌辦

朕亦不懸揣適制也又據稱令觀成回西安駐守
另派七十五在夔州防守并因圖桑阿老病令其
回京所奏俱是目應如此辦理其打仗陣亡之守
備趙祥候補千總譚一洪二員俱着咨部議卹此
次打仗情形閱摺內所稱將賊衆全數逼至河沿
痛加殲戮及撲河淹斃者不計其數在將士等奮
勇爭先自不得不乘勝痛剿但邪匪逼脅良民人

數衆多以致臨陣被殲玉石俱焚難分順逆閱之
彌覺惻然勒保身膺重任惟當仰體朕心視國事
如家事昨復降旨將永保長子凝志賞給藍翎侍
衛次子凝華賞給親軍校係朕格外施恩勒保永
保兄弟二人應如何良心發現迅勉成功也

上又命軍機大臣傳諭署山東巡撫岳起曰據勒保
奏調山東兵丁一千餘名已飛咨山東撫臣催令

迅速調派起身此時川省擒獲首逆陝省正資堵
剿著岳起查照來咨數目迅速挑選健壯兵丁并
派明幹將弁督率前往卽赴軍營聽候應用毋致
遲延

二十七日

乙酉

廣厚奏言

臣

與吉蘭泰由黑崖山

小路截擊賊匪行抵沙坪接據署涼州府沈清
署階州朱超遊擊范濬等稟報賊匪由佛堂溝

竄至高橋沈清等卽帶領兵勇於羅家寨防堵
用鎗礮擊適將軍富成趕到追殺賊匪遂繞
道奔赴黃家壩兩水等處卽於兩水分股一股
五六千人向涼恭竄逸一股六七千人向宕昌
竄逸富成現在追趕宕昌一股賊匪各等情查
宕昌地方臣先因該處係通岷州大路移令護
洮岷協副將五明阿調洮州土兵六百名帶領

馳赴分水嶺一帶防堵富成現在躡蹤追剿惟

涼恭山徑崎嶇現無防兵

臣

卽同吉蘭泰催兵

兼程前進并派守備閻應龍千總王懷吉帶兵

百名先行馳往行抵閭井正遇賊匪前哨數百

餘人在該處搶掠馬匹該守備等奮勇截殺

臣

與吉蘭泰亦帶兵趕到卽督兵圍捕生擒騎馬

賊目冉玉煥楊大惠二名殲斃七十餘名餘匪

捨命奔回旋聞賊匪大衆已連夜竄赴新寺鎮

臣

等卽由寫溝間道馳抵黃家河距新寺鎮三

十里探知賊匪在彼屯紮臣因與吉蘭泰商酌

將路徑形勢查詢明確於三更時乘月色甚明

帶兵前往距鎮數里派署同知縱司燁守備敖

世俊帶兵四百名於南面溝內埋伏都司巴翰

璧知州張利溥帶兵四百名於西面山後埋伏

臣

等帶兵一千名由中山路進發吉蘭泰率同

都司馬良棟劉天秩守備閻應龍直撲鎮內喊

言官兵大至賊匪驚惶失措紛紛回竄自相擁

擠吉蘭泰帶領兵將鎗箭刀矛一時並舉環繞

截殺臣於鎮外率守備李殿魁用鎗礮轟擊復

令署縣丞席濂熙磨金勝等高聲傳諭如係本

地被裹良民各釋兵器逃生頃刻解散無數賊

匪悉力衝突縱司燭巴翰望等兩路伏兵齊出
接應奮力迎擊斬獲愈多賊匪情急隨搶上東
回山梁山勢險峻仰攻較難時已昏暮賊匪拚
死抵拒臣等激勵將士乘勝進攻鄉勇熊魁攀
崖先登中矛陣亡把總郭希順武舉金毓林米
廷基外委馬虎張興忠率兵一擁齊上賊匪不
能抵禦卽山山後翻越奔逃臣等查驗奪獲大

礮二位馬騾二百餘匹頭器械旗幟無算約計
殲賊實有一千餘人生擒羅文得等一百八十
六名內有實係本地被裹趙富保等七十七人
當卽釋放訊據羅文得等供稱此股係藍號逆
首張映祥並張世龍張世虎張世鳳兄弟三人
與宕昌一股約定在新寺鎮會齊同攻鞏昌府
適纔頭戴紅頂身穿紅馬褂被礮打死者卽張

世龍屍軀被張世鳳令人搶去至宕昌一股係
白號逆首楊添柱有大頭目蕭姓秦姓不知其
名等供當卽均行正法此次打仗兵丁傷亡共
計六十二人旋據探差回報賊匪已窮竄至寧
遠之鴛鴦嘴樂善鎮等處臣等當卽差人由捷

徑知會前派防守西禮之遊擊富珠隆阿等帶
領該處防兵八百名馳往抄截臣等亦卽緊躡

窮追務期先將此股賊匪全數撲滅奏入

上命軍機大臣傳諭恒瑞富成廣厚曰廣厚奏痛剿賊匪分路追剿情形所辦甚好近日川省蕭占國冷添祿等股竄匪業經先後剿淨朕所慮者正在甘省今據廣厚奏賊匪張映祥等或分或合經官兵追剿殲賊一千餘人生擒一百八十六人并將賊目張世龍擊斃剉散賊匪出山後奔竄覽奏深

爲欣慰此皆係廣厚吉蘭泰二人之功廣厚著加
恩賞戴花翎吉蘭泰著加恩賞給伊青阿巴圖魯
名號並賞戴花翎以示嘉獎其直上山梁剿賊之
把總郭希順武舉金毓林米建基外委馬虎張興
忠俱著交部議敘其殺賊陣亡之鄉勇熊魁著咨
部議卹此股賊匪勢已窮蹙廣厚吉蘭泰當乘勝
進擊速行剿淨後卽前赴富成一路夾擊宕昌一

股白號賊匪此二股一經剿竣甘境即可肅清至
賊匪現在奔竄地方係在鞏昌一帶相距陝境不
遠並著恒瑞察看情形派撥弁兵預行堵截毋任
甘省竄匪乘間闖入陝境爲要